

ERT

Joegn artisc cresc dò la pedies del maester

L'confront anter generaziions à caraterisà l simposie de statues zipièdes te la neif metù a jir a Poza da la Scola, l Comun e l'Union di Ladins per recordèr Toni Gross

L'è stat l raport anter generaziions chel che é sutà fora più che dut tel simposie che per 3 dis à vedù 2 artisc cognosciui, 20 studenc e 4 professores se dèr jù tel parch di jeghes de Poza per zipièr sia operes fora da n bloch de neif.

L'arlief «storich» de Toni Gross, Egidio Petri, à zipià n liber che lascia ciutèr fora te la pruma plates l mus de n maester, con la longia bèrba biencia, e te la ultimes chel del joen ritadin. L'auter artist, Paolo Costazza, ence el ex arlief de l'Istitut d'èrt e de Gross, à cernù, tel temp de carnaschèr, la feTURES gustegoles de morchies per portèr dant n conzet emportant, apontin chel del dialogh (o de sia mencianza) anter la generazion e di pregiudizies che de spes caraterisea chest raport.

Vejin a ic, l confront anter maestres e arlieves se à concretisà coi doi gropes de studenc de 3^a e 4^a del Liceo Artistich Feguratif e

si professores Davide Deflorian, Matthias Sieff, Tiziano Deflorian e Andrea Dorigatti. L'amor per la mont, col levèr e l fiorir del soerie anter i crepes, a seconda de la prospetiva, e la ciaseta che straverda da freit e pericoi e la sera ite, fosc ence massa, te tempes de lockdown e smartworking, l'è stat i temes cernui e realisè con empegn e braùra dai doi gropes de studenc. Per n muie de ic l'era la pruma esperienza de zipièr n gran bloch de neif, per duc l'è stat na bela ocasion per poder fèr vèlch adum, con gaissa, en prejenza e a l'averta, e te tempes de didatica da dalonc chest no l'è pech.

Segur n gran empegn per la Scola de Fascia, che à cognù endrezèr l hurier di studenc tel respet de normes e precauzions, e per l Comun de Sèn Jan e l'Union di Ladins de Fascia, che no à volù renunzièr a na scomenzadiva emportanta che aea cognù vegnir descancelèda chest

uton e che é ruèda a compiment ades ence col sostegn de l'APT de Fascia, enceben che chest'outa a se n emprevaler sie stat demò noscia jent.

En vender ai 5 de firé, te n curt moment finèl, i raprezentanc di enc organisadores à uzà fora i valores e l segnificat de chisc momenc che valorisea l'èrt e de la cultura e i fèsc memoria de persones, desche Tone Punz, che ne à lascià na ritajon preziosa. Tè si intervenc i à reingrazià duc chi che se à dat jù e l devalpai emozonà é stat portà dant ence da la fia de Toni Gross, Lucilla, a inom de duta la familia.

N atestat de partezipazion e na piccola bandiera ladina, segnes de devalpai e de leam col teritorie, consegné a chi che à tout pèrt al simposie, restarà a ge recordèr a duc chesta esperienza ence canche la statues de neif sarà oramai deleghèdes da n pez. lg



Studenc e insegnanc dedant a sia operes, organisadores e artisc tel moment finèl e la doi statues de Petri e Costazza.